

რუსეთის სოციალდემოკრატიული მუშათა პარტია.

პროლეტარებო ყველა ქვეყნისა, შეერთდით!

დემოკრატიული —

— რესპუბლიკა.

რ. აბსენიძე.

გამოცემა ამიერ-კავკ. მუშათა ს.-დ. ორგ. საოლქო
კომიტეტისა.

თფილისი.

სტამბა „სორაპანი“ მადათოვის კუნძული.

1917 წ.

დემოკრატიული რესპუბლიკა.

I

შესავალი.

მოახლოვებულია არჩევნები დამფუძნებელ კრების, რომელმაც ახალი წესწყობილება უნდა დაამკვიდროს თავისუფალ რუსეთში.

დღეს ასეთ წყობილებათ თითქმის ყველა პროგრესიული პარტიები ასახელებენ დემოკრატიულ რესპუბლიკას. მარა ექვი არაა თვითთელი პარტია, თვითთელი კლასი ამ სიტყვებში განსაკუთრებულ შინაარს გულისხმობს. ამიტომ ზედმეტი არ იქნება გამოვარკვიოთ, თუ როგორ ვუყურებთ ჩვენ, სოციალდემოკრატები ამ საგანს.

დემოკრატიული რესპუბლიკა ორი სიტყვისაგან შესდგება: „დემოკრატიული“ და „რესპუბლიკა“. დემოკრატიული წარმოსდგება ბერძნული სიტყვისაგან დემოსი—ხალხი და ნიშნავს სახალხოს. რესპუბლიკა კი ლათინური სიტყვაა და ორ ნაწილს შეიცავს, რეს—საქმეები და პუბლიკა—საზოგადოება, ე. ი. საზოგადო საქმეები. აქედან ეს სახელწოდება ეძლევა სახელმწიფო საქმის საზოგადოების მიერ წარმოებას.

რატომ არ ვკმაყოფილდებით ჩვენ მარტო რესპუბლიკის მოთხოვნით და ვთხოულობთ დემოკრატიულ რესპუბლიკას? რატომ ორივე სიტყვას ვხმარობთ და არა ერთს?

აი რატომ. რესპუბლიკა საზოგადო საქმეების საზოგადოებისაგან წარმოებას ნიშნავს, მარა საზოგადოება მრავალნაირია, ქრელია. არინ შიგ მდიდარიც და ღარიბიც, თავადიც და გლეხიც, კაპიტალისტიც და მუშაც, არიან გაბატონებულნი და დამორჩილებულნი. რომელმა უნდა აწარმოოს და მართოს საზოგადო საქმეები? რომელი უნდა იყოს ბატონ-პატრონი მთელი სახელმწიფოსი? ჩვენ ვამბობთ, რომ ასეთი უნდა იყოს მთელი ხალხი, დემოსი, და ამიტომ ჩვენ გვინდა რესპუბლიკა დემოკრატიული, ე. ი. ისეთი, სადაც ხალხი, დემოსი, იქნება საზოგადოებრივ საქმის მართველი და გამგე, კანონმდებელი და ამსრულებელი.

სიტყვა „რესპუბლიკა“ ამნაირათ აღნიშნავს ფორმას სახელმწიფოსას, სიტყვა „დემოკრატიული“ კი ეხება შინაარსს.

განვიხილოთ ესენი ცალცალკე:

როგორ წყობილებას ეწოდება რესპუბლიკანური?

II

მონარქია და რესპუბლიკა.

დღემდის მთელი სახელმწიფოს სვე-ბედის გამგე—ერთი კაცი იყო—მეფე, იმპერატორი. ის სცემ-

და კანონებს, იძლეოდა ბრძანებას, ნიშნავდა მინისტრებს, მოხელეებს, მოსამართლეებს, და ამათი საშვალებით განაგებდა მთელ ქვეყანას.

ყოველი საქმე „მისი იმპერატორებითი უმაღლესობის უქაზით“ წყდებოდა. არც სიტყვის შემბრუნებელი, არც გამსწორებელი მას არავინ ყავდა. რაც თავში მოუვიდოდა, იმას ბრძანებდა და მის დამქაშებს უნდა აესრულებიათ. მას გარს ეხვია მასავით უპასუხისმგებლო პირისთვარეშები და ნაზირ-ვეზირები, რომელთაგან თვითიული ცდილობდა მეფის გული მოეგო და თავისთვის რაიმე სასარგებლო დაეცინცლა: უმაღლესი მოხელეობის შოვნა, მამულის და ქონების ბოძების ქალაღდი მიელო და სხვ. ერთი სიტყვით, იყო მეფე და მისი თანამხლებლები. თუ მმართველი უგუნური და უაზრო იყო ეს ხალხს აწვებოდა ტვირთათ. ამ უკანასკნელს უნდა ეზლო მათი წახდენილი საქმე. თუ ჭკუა და გონიერება გააჩნდა, ეს ხალხს ზურგიდან ორკეცი ტყავის აძრობას უქადდა, რადგან რაც მეტი გონიერება ქონდა მეფეს და მის დამქაშთ, მით მეტ უნარს და მოხერხებას იჩენდენ ხალხის გატყავებაში.

ამრიგათ ჭკვიანი. მეფეც დიდი უბედურება იყო ხალხისთვის და უჭკუოც.

აი მაგალითები. ეკატერინე დიდი ჭკვიანი დედაკაცი იყო, მარა მთელ რუსეთს ბატონყმობის უღელი დაადვა, და სადაც ეს ყოვლად უსამართლო წესი არ არსებობდა, იქაც ძალათ შემოაღებინა. ალექსანდრე I არ იყო ჭკუას მოკლებული, მარა

საქართველოს დაპყრობა, მასთან დადებულ ხელ-შეკრულების დარღვევა და ბატონყმობაში რუსულ-ლი წესების, ერთ ბატონზე მიჯაჭვის შემოღება იმასაც არ უთაკილია.

ალექსანდრე II-ის სწორეთ ქვეყანობით და მიხვედრილობით მოუვიდა გლეხთა „განთავისუფ-ლება“, მარა ეს იმისთანა „განთავისუფლება“ გა-მოდგა, რომ მაშინ გატყავული გლეხის ზურგი დღემდე არ მოშუშებულა. იმ დროიდან უმიწაწყ-ლოთ დარჩენილი გ. ეს-კაცობას დღევანდლამდე სული ხდება სხვის ყანებში მუშაობით, და შინ ცოლშვილი უტირის უპურობით

ამდენი ბრძოლა, სისხლის ღვრა და რევოლიუ-ციის მოხდენა შეიქნა საჭირო, რომ ამ უსამართ-ლობის გამოსწორება შესაძლებელი გამხდარიყო, გლეხისთვის წართმეული მიწის დაბრუნება დღიურ წესრიგში დამდგარიყო.

როგორც მეფეა ისეთია მისი ხელ ქვეითები, ამის მტკიცება, დარწმუნებული ვარ, საჭირო არ იქნება. მკითხველს უჩემოთაც ექნება ნახული გემო ჩვენი ძველი მოხელეების, გუბერნატორიდან დაწ-ყებული—უკანასკნელ „სტრაჟნიკით“ და „გოროდო-ვოით“ გათავებული.

ამნაირათ აქ ხალხს ხმა არ აქვს, მას არაფერს ეკითხებიან. მის ნება-სურვილს ანგარიშს არ უწე-ვენ. აქ მთელი სახელმწიფო ერთი კაცია—იმპერა-ტორია.

ასეთ წყობილებას ეწოდება მეფის თვით-მპყრობელობა.

რევოლიუციამ დღეს ასეთი წყობილება დაამ-
ხო, ტახტი გააუქმა. და ნუ თუ მის მაგიერ ახალი
მეფე უნდა წამოგასკუპოთ?

ასეთი სულელი ვინ იქნება, იტყვის მკითხვე-
ლი, განა სისხლი იმისთვის დავღვარეთ, რომ ხელ
ახლა ბატონი დავისვით კისერზე?

მარა საქმე არც ისე მარტივია, როგორც
მკითხველს გონია. მეფე რუსეთში ჯერ კიდევ ბევრს
უნდა ისევ ტახტზე წამოასკუპოს.

რევოლიუციის მეორე დღეს ლიბერალების
ლიდერმა მილიუკოვმა განაცხადა, ნიკოლოზის ნაც-
ვლათ ტახტზე გვინდა მისი შვილი დავსვით და
რეგენტათ, ე. ი. აპეკუნათ, მეფის ძმა მიხეილი და-
ვუყენოთო. რომ რევოლიუციონურ ხალხს სიმაგრე
არ გამოეჩინა - ეს პლანი დღეს განხორციელებული
იქნება, მიხეილ რომანოვი მეფეთ გვეყოლება „ნე-
ბითა ძმისა თვისისა“. მარა პეტროგრადის მუშათა
და სალდათთა. საბჭომ გადაჭრით მოითხოვა მეფის
ტახტის დამფუძნებელ კრებამდე გაუქმება და იგი
დღემდე ცალიერია. მიხეილ რომანოვი, როგორც
მისი პირველი კანდიდატი, დამფუძნებელ კრების
განაჩენს უცდის, რომ ისევ ტახტზე დაემკვიდროს.

ჩვენი მიზანია ეს განაჩენი მის სასარგებლოთ
არ იქნეს და ტახტი სამუდამოთ ცალიერი დარჩეს.
ხალხს მეფე არ ესაჭიროება. დღეს უმეფოთაც,
როგორც ვხედავთ, ჩინებულათ ვცხოვრობთ, ბევ-
რათ უკეთესათ, ვინემ მეფის დროს. ახლა სულს
არავინ გვაძრობს და მათრახებს არ გვილაწუნებს.

მოხელეებსაც ჩვენ ვირჩევთ და მეფის დასტური აღარ გვესაჭიროება.

მაშ, ვის უნდა მეფე?

იმას, ვისაც არ სურს ხალხს სრული თავისუფლება ქონდეს გვეტყვიან, მეფე უნდა იყოს, მარა შეზღუდული, ხალხის ნების ამსრულებელიო.

არის ასეთი ქვეყნები, სადაც რევოლუციამ სრული გამარჯვება ვერ მოიპოვა, სადაც ამიტომ მეფის ჩამოგდება ვერ მოხერხდა და იგი მხოლოდ შეიზღუდა უფლებებში ხალხის წარმომადგენლებისაგან.

ასეთ წყობილებას ეწოდება მონარქიული კონსტიტუცია.

აქ ხალხის სვე-ბედს განაგებენ მეფე ერთ-მხრით და ხალხის არჩეული დეპუტატები მეორე მხრით. ამათ შორის არის განაწილებული უფლება კანონის გამოცემის და ასრულების. ზოგან მეფეს პეტი უფლება აქვს, ზოგან ხალხის არჩეულ დეპუტატებს, ანუ პარლამენტს.

ჩვენც გვქონდა სახელმწიფო დუმა. მარა იქ გაგზავნილ ჩვენს დეპუტატებს უფლება ქონდათ მხოლოდ ლაპარაკის, იგიც ყველაფერზე კი არა, — და მათ დადგენილებას კი თუ სახელმწიფო საბჭო არ მოიწონებდა და მეფე არ დაამტკიცებდა, ისე ძალაში შესვლა არ შეეძლო.

ამ რიგათ ფაქტიურათ სახ. დუმა ლაპარაკობდა, მეფე კი მოქმედებდა. ყველა მოხელეებსა და მოსამართლეებს ის ნიშნავდა. მინისტრები მის ხელში იყო. ერთი სიტყვით მეფის თვითმპყრობელობა არსებითათ თითქმის სრულიად შეუზღუდველი იყო.

ევროპაში არის ისეთი ქვეყნებიც, სადაც პარლამენტს მეტი მნიშვნელობა აქვს, ვინემ ჩვენში ქონდა სახ. დუმას.

ამ ქვეყნებში კანონის გამოსაცემათ საჭიროა ერთი მხრით პარლამენტის თანხმობა, მეორე მხრით მეფის, უკეთუ მათ შორის შეთანხმება არ ხდება, კანონი უარყოფილათ ითვლება. თუ პარლამენტი ჯიუტობას იწყებს--მეფეს უფლება აქვს იგი გარეკოს და ხელ-ახალი არჩევნები დანიშნოს. არჩევნების დროს კი შეცდება, რასაკვირველია, ხალხს ძალა დაატანოს და თავის სასურველი დეპუტატები აარჩეინოს...

ამიტომ აქ ამ ორ ძალთა შორის უთანასწორო ბრძოლა წარმოებს, რის გამო ხალხის სასარგებლო კანონის გამოცემა შეფერხებულია.

მეფის თვითნებობა აქ მხოლოდ შეზღუდულია და არა გაუქმებული. ამიტომ ასეთ წყობილებას შეზღუდული მონარქია ეწოდება. ამ წყობილებაში არც მეფეს აქვს სრული ბატონობა, არც ხალხს, მარა ამით მხოლოდ გაბატონებული კლასები სარგებლობენ მეფე მაღალი წრის კაცია და მათ ინტერესებს ემსახურება. მუშათა კლასი და საზოგადოთ მშრობელი მასსა, საზოგადოების ღარიბი ნაწილი კი დაჩაგრული და აბუჩად აგდებულია.

მდგომარეობას აუარესებს ისიც, რომ ამსრულე-ბელი ძალა ერთიანათ მეფის ხელშია. მოხელეები, მინისტრები და სხვა მის განკარგულებაში იმყოფე-ბიან მართალია ზოგან პარლამენტს უფლება აქვს

მინისტრებს უნდომრობა გამოუცხადოს და გადააყენოს, რაიცა საშვალებას აძლევს მათზე მეფის გავლენა შეასუსტოს და თავისი გააძლიეროს, მარა ზოგან ხალხის წარმომადგენლები ამ უფლებასაც მოკლებული არიან. ასეთი მდგომარეობა იყო რუსეთში რევოლიუციამდე. ასეთი წესებია გაბატონებული გერმანიასა და ავსტრო-უნგრეთშიაც, თუმცა იქაურ პარლამენტებს საერთოთ გაცილებით მეტი უფლებები აქვს, ვინემ სახელმწიფო დუმას ქონდა ჩვენში.

ამიტომ ამ სახელმწიფოებს ნახევრათ თვითმპყრობელური სახელმწიფოები ეწოდება. და იქაურ მეფეებს—ნახევრათ-თვითმპყრობელი.

მხოლოდ ინგლისს ყავს ისეთი მეფე, რომელსაც თითქმის არავითარი უფლება არა აქვს სახელმწიფო საქმეებში ჩარევის. მისი მოვალეობაა მხოლოდ ხელის მოწერა და ჯამაგირის მიღება.

მარა ინგლისის ხალხს 7 საუკუნე დასჭირდა მეფეებთან საბრძოლველათ, რომ მათი უფლებები და ბატონობის სურვილი ასეთ არარაობამდე დაეყვანა.

ჩვენ არ გვსურს, რომ ერთი კაცის ნება სურვილს იმდენი ან მეტი მნიშვნელობა ქონდეს, რამოდენიც ათი-ათას და მილიონ ხალხს აქვს.

ჩვენ არც ის გვინდა, რომ 7 საუკუნე ვიბრძოლოთ და შემდეგ მუქთა მკამელი გავიჩინოთ სარჩენათ.

ჩვენ მუშა ხალხისთვის მეტ ბარგათ და სა-

ზარალოთ მიგვაჩნია როგორც უფლებიანი მეფე, ისე უუფლებო.

ჩვენი მიზანია — უმეფო წყობილება. მეფის ნაცვლათ ქვეყნის მართვა-გამგეობა უნდა ჩაბარდეს ხალხის მიერ არჩეულ პირთა კრებულს, ხალხის ნდობით აღჭურვილს, რომელნიც ყოველ საქმეს მისი სახელით და მისი სურვილის თანახმად გააკეთებენ.

აი, ასეთ წყობილებას, სადაც მეფის ტახტი გაუქმებულია და მთელი მართვა გამგეობა ხალხისაგან არჩეული პირების ხელშია, ეწოდება რესპუბლიკანური წყობილება.

III.

დემოკრატიული რესპუბლიკა და სპარჩევნო სისტემა

რესპუბლიკა სხვადასხვანაირია. იმისდა მიხედვით, თუ ვინაა მასში გაბატონებული, არისტოკრატია, ე. ი. მემამულეთა კლასი, ბურჟუაზია, თუ ხალხი, მასსა, რესპუბლიკაც არის არისტოკრატიული ბურჟუაზიულ-ლიბერალური და დემოკრატიული.

რითაა გამოწვეული ამა თუ იმ კლასის გაბატონება?

პირველ ყოვლისა რასაკვირველია ეკონომიური ბატონობით, ე. ი. იმ ეკონომიური ძლიერებით, რომელიც ამა თუ იმ კლასს აქვს მოპოვებული სწოვადობაში.

ძველ საბერძნეთში მთავარი წოდება მემამუ-

ლეთა კლასი იყო და მათი „დემოკრატიზმი“ მემამულეთა წრეს არ სცილდებოდა. იქ მონა, უფლებას მოკლებული სახელმწიფო საქმეებში არავითარ მონაწილეობას არ იღებდა.

თანამედროვე ევროპის სახელმწიფოებში თითქმის ყველგან როგორც მონარქებში, ისე რესპუბლიკებში ბურჟუაზიული კლასი წარმოადგენს ეკონომიურათ ყველაზე ძლიერს და ამიტომ პოლიტიკურათ გაბატონებულია.

ამ ფაქტის შეცვლა ჩვენ დღესდღეობით მაინც არ შეგვიძლია.

მათი ეკონომიური ბატონობის დაცემა—ძომავალი სოციალისტური რევოლიუციის საქმეა.

დღეს კი ჩვენ წინ პოლიტიკური რევოლიუცია წარმოებს და ამის შედეგათ ახალ პოლიტიკურ წყობილების დამყარებაა გამხდარი მორიგ საკითხათ.

გაბატონებულ კლასებს ძალიან უყვართ თავის უპირატესობანი კანონით გაამაგრონ და ასე დემოკრატიისგან უზრუნველყოფილი გახადონ, ე. ი. ეკონომიურ ბატონობას, პოლიტიკური პრივილეგიებიც დაუმატონ და ამით თავისი ძალა და გავლენა გააორკეცონ.

თუ პირველ ბატონობას დღეს კიდევ არა ეშველება რა, მეორის გაუქმება ჩვენს ხელთ არის. დღევანდელმა პოლიტიკურმა რევოლიუციამ ეს უნდა მოიმოქმედოს.

რა საშუალებით აღწევს ბურჟუაზია თავის მიზანს?

უსამართლო საარჩევნო სისტემით და არა დემოკრატიულ სახელმწიფო ორგანიზაციით. განვიხილოთ ესენი ცალკე.

თუ არჩევნებში მონაწილეობის უფლებას უმთავრესათ მიწისმფლობელობით განვსაზღვრავთ, ცხადია არჩეული დეპუტატებიც მემამულეთა კლასის წარმომადგენლები იქნებიან და ფეოდალთა ინტერესებს დაიცავენ. ასე იქცეოდა მაგ. მესამე და მეოთხე სახ. ღუმის უმრავლესობა.

მარა დემოკრატია ასეთ წესს ვერ შეურიგდება.

მემამულეთა კლასი, მსხვილი თავად-აზნაურობა გაქრობის გზას ადგია. რეკოლიუციამ თვითმპყრობელობის დამხობით მათ ეკონომიურ არსებობას კი სამარე გაუთხარა, მან—მიწების კონფისკაცია მორიგ კითხვათ დასვა. მიწის ჩამორთმევით ეს მცონარე და უსარგებლო კლასი გაქრება, ფეოდალიზმი ძირბუდიანათ ამოიფხვრება.

ცხადია ასეთ პირობებში მათ პოლიტიკურ პრივილეგიებით აღჭურვა ფიქრათაც არავის მოუვა. არისტოკრატიული რესპუბლიკები ძველი საბერძნეთის და რომის იმ ხანას გადაყვა, რომელსაც მონობის ხანა ეწოდება. დღეს უკვე ასეთი კლასის ბატონობას არსად ადგილი არა აქვს და არც რუსეთში ექნება.

სამაგიეროთ დღევანდელმა კაპიტალისტურმა ცხოვრებამ მემამულეთა ნაცვლათ ბურჟუაზიული კლასები წამოაყენა. ბურჟუაზია თუმცა პირველი მებრძოლი იყო ოდესლაც ძმობის, თანასწორობის და

თავისუფლებისთვის, მარა ადამიანს იგიც ქონებით აფასებს და არა ადამიანობით. ამიტომ პოლიტიკურ უფლებებს იგი ანიჭებს შეძლებას, ქონებას, შემოსავალს და არა მოქალაქეს. მისი სანატრელი საარჩევნო უფლებაც ცენზიანი არჩევნებია. ვისაც ქონება აქვს, ის ირჩევს, ვისაც არა, მას სახელმწიფოს წყობილების არაფერი არ უნდა ეკითხებოდეს. ასეთია მისი დევიზი, ამით იგი თავიდან იშორებს ყველაზე საშიშ მტერს—მუშათა კლასს, რომელსაც ისტორიამ მისი მესაფლავეს როლი დააკისრა: დანარჩენ კლასების და ჯგუფების მას არ ეშინია.

მუშათა კლასის უფლებას კი ყოველგვარი შეზღუდვა ამცირებს.

მიეცით არჩევნების უფლება ქონების პატრონთ, პროლეტართა კლასი გარიყული დარჩება. მას ქონება არა-აქვს. მოსთხოვეთ ერთი წლის ცხოვრების ვადა იმ ადგილში, სადაც კენჭის ყრა ხდება და მუშათა დიდნი ნაწილი—მუდამ სამუშაოს საძებრათ მოსიარულე, აქაც უფლება აყრილი შეიქნება. ერთი სიტყვით, ყოველი ზღუდე—მისთვის ბორკილია.

ცხადია თუ ასეთი ზღუდე დარჩა რუსეთის მომავალ რესპუბლიკაში, მაშინ დეპუტატთა კრებულში, ე. ი პარლამენტში უმთავრესათ მხოლოდ შეძლებული ბურჟუაზიის წარმომადგენლები მოხვდებიან და ამით თვით რესპუბლიკა—ბურჟუაზიული-ლიბერალური იქნება. მუშათა კლასს იქ ან სულ არ ეყოლება წარმომადგენლები, ან ძალიან მცირე და უმნიშვნელო.

აი ამიტომ მუშათა კლასის პარტია, სოციალ-დემოკრატია, გადაჭრით წინააღმდეგია საარჩევნო უფლების ყოველგვარი შეზღუდვის. რევოლიუცია ხალხმა, დემოკრატია, მოახდინა. და საარჩევნო სისტემაც უნდა დემოკრატიული იქნეს, ე. ი. არჩევნების უფლება უკლებლივ მთელ ხალხს მიენიჭოს. მხოლოდ ისეთ წყობილებას, სადაც ხალხი, მთელი მასხა არის წყარო და სათავე ყოველივე უფლების, სადაც მისი ყოველი წევრი თანასწორი უფლებით არის აღჭურვილი, მხოლოდ ისეთ წყობილებას ეწოდება დემოკრატიული.

სოციალდემოკრატიული პარტია, როგორც წარმომადგენელი ყველაზე უფრო დემოკრატიულ კლასის—პროლეტარიატის საუკეთესო და თავდადებული დამცველია დემოკრატიის ინტერესების. ამიტომ იგი მომხრეა ხალხის თვითმყრობელობისა, ე. ი. ისეთი წყობილების, სადაც ყოველივე მხოლოდ და მხოლოდ ხალხის თავისუფლათ გამოთქმულ ნება სურვილზე იქნება დამოკიდებული.

ამ მიზნით სოციალდემოკრატიული პარტია თხოულობს, რომ არჩევნები მოხდეს საყოველთაო, თანასწორი, პირდაპირი და ფარული კენჭის ყრით, არჩევნებში მონაწილეობის უფლება მიეცეს ყველა სრულწლოვან (20 წლის) მოქალაქეს განურჩევლათ სქესისა, ეროვნებისა და სარწმუნოებისა.

მხოლოდ ასეთ პირობებში შეუძლია ხალხს თავის სასურველი კანდიდატები აირჩიოს და მარ-

თვა-გამგეობა თავის სანდო პირებს ჩააბაროს. მხოლოდ ასეთ არჩევნებს ეწოდება დემოკრატიული და ეს უნდა დააკანონოს დამფუძნებელმა კრებამ.

IV.

პრეპლაზმინი რესპუბლიკა.

მარტო სახალხო არჩევნების შემოღება არ კმარა დემოკრატიის ინტერესების დასაცველათ. ამ მიზნის მისაღწევათ საჭიროა თვით სახელმწიფო წყობილებაში ისეთი სისტემის წესი იქნეს დაწესებული, რომელიც ხალხისთვის უფრო ხელსაყრელია.

აქედან ჩვენ წინაშე სდგება საკითხი სახელმწიფოს ორგანიზაციის, რაიც ძირითად კანონებში უნდა იქნეს აღნუსხული და დამტკიცებული

ამ ძირითად კანონების კრებულს ეწოდება კონსტიტუცია, როგორი უნდა იყოს კონსტიტუცია დემოკრატიულ რესპუბლიკაში?

ყოველ სახელმწიფო ორგანიზაციას სამი ძირითადი მოვალეობა აქვს. პირველი და უმთავრესია მიმდინარე კანონების გამოცემა, სახელმწიფო შემოსავალ-გასავალის დამტკიცება და სხვ. რისთვისაც უნდა დაარსდეს განსაკუთრებული საკანონმდებლო ორგანო. მეორეთ საჭიროა კანონების და სხვა დადგენილებების სისრულეში მოყვანა, ცხოვრებაში გატარება. ეს ევალება აღმასრულებელ ძალას. სემანეა—კანონის დამრღვევთა განსჯა და სამართ-

ლის აღდგენა. ეს შოვალეობა სამოსამართლო ძალას აქვს დაკისრებული.

ამნაირათ საქიროა საჩი ორგანო: კანონმდებელი, ამასრულებელი და სასამართლო. ამ სამი ნაწილისაგან შესდგება ყოველი სახელმწიფოს მართვა-განგეობა.

როგორ უნდა მოეწყოს ეს სამი ორგანო, ე. ი. ძალა კანონმდებელი, ამასრულებელი და სასამართლო? რა გვარი იქნება მათი ორგანიზაცია?

ამის პასუხი უნდა მოგვეცეს დამფუძნებელმა კრებამ, რომელიც სპეციალურათ ამისთვის იკრიბება.

დამფუძნებელი კრება მხოლოდ ამ ერთხელ იქნება. შემდეგ კი დაგვრჩება მუდმივი ორგანიზაციები, რომელთაც ის შემოიღებს, ე. ი. კონსტიტუცია, რომელსაც ის შეიმუშავებს.

სახელმწიფო დაწესებულებების სიაგ-კარგე ამ კონსტიტუციის სიაგ-კარგეზეა დამოკიდებული.

ამიტომ იგი ჩვენგან ორკეცი ყურადღების ღირსია.

პირველი კითხვაა: ვინ უნდა იყოს კანონმდებელი რესპუბლიკის დროს?

რესპუბლიკანურ წყობილებაში ბევრნაირ-საკანონმდებლო წესებს შეხვდებით. საფრანგეთში და ჩრდილოეთ ამერიკის შეერთებულ შტატებში მაგ. კანონის გამოსაცემათ ორი პალატა არსებობს: ზედა და ქვედა. ქვედა პალატას ეწოდება პარლამენტი, ამერიკაში კონგრესი, ზედას—სენატი. ქვედა პალატაში სხედან ხალხის მიერ პირდაპირი, საყო-

ველთაო, თანასწორი და ფარული კენკის ყრით არჩეული დეპუტატები. ზედა პალატაში კი ადგილობრივ თვითმართველობისაგან, [ამერიკაში შტატებისაგან] გამოგზავნილი დეპუტატები. ამნაირათ ზედა პალატის არჩევნები ორსართულიანია, ესე იგი არადემოკრატიული. ამიტომ თვით ეს ზედა პალატა უმთავრესათ შეძლებულ კლასთა წარმომიდგენელია. დემოკრატიას კი მასში ცოტა ან სრულიად არავითარი გავლენა არ აქვს. პარლამენტიდან კანონი,—პროექტი ჯერ ამ ზედა პალატაში წაიხილეს, შემდეგ სენატში გადადის. და თუ მანაც მოიწონა, მაშინ იგი რესპუბლიკის პრეზიდენტს წარედგინება დასამტკიცებლათ. თუ ერთმა ამთგანმა კანონი უარყო, იგი ძალაში ვერ შევა და კანონათ ვერ იქცევა.

ამრიგათ კანონს აქ სამი საფეხური აქვს გასაველელი, რის გამო იგი იცხრილება და ბოლოს ხალხისთვის სრულიად გამოუსადეგარი, ან პირდაპირ მავნებელი ხდება.

მკითხველი ადვილათ დაინახავს, რომ კანონების გამოცემის წესი აქ ისეთივეა, როგორც შეზღუდულ მონარქიაში, სადაც სახელმწიფოს სათავეში მეფე უდგას. განსხვავება მხოლოდ ისაა, რომ მეფის ადგილი აქ პრეზიდენტებს უჭირავს. ამნაირათ ასეთ რესპუბლიკაში ორი დაწესებულებაა ზედმეტი ხალხის ინტერესებისათვის: ზედა პალატა და პრეზიდენტი.

განვიხილოთ ესენი თვითთულათ.

ქვედა პალატაში, ანუ პარლამენტში ხალხის წარმომადგენლებია არჩეული, ე. ი. ისეთი პირები, რომელნიც ხალხის ინტერესებს საუკეთესოთ გამოხატავენ, რამდენადაც კი ეს დღევანდელ პირობებში შესაძლებელია.

ხოლო საჭიროა კიდევ მის ზევით მეორე პალატის წამოხკუპება და თუ იქ იგივე წარმომადგენლები იქნებიან, რაც ქვედა პალატაში, მათი არსებობა სრული უაზრობა და წყლის ნაყვა იქნება. ამიტომ ეს არსად ასე არ ხდება.

პირიქით ზედაპალატაში ყოველთვის სხედან შეძლებული კლასების წარმომადგენლები. ინგლისში ლორდები, ე. ი. მსხვილი მემამულეები მეფისაგან დანიშნულნი, საფრანგეთში სენატორები, რომელნიც არჩეულ არიან ნახევრათ ბიუროკრატიულ თვითმართველობისაგან და, ამიტომ უფრო გაბატონებულ კლასების ინტერესების დამცველათ გამოდიან, ჩრდილო ამერიკის შეერთებულ შტატებში სენატის წევრთ შტატების პარლამენტები ირჩევენ. და რადგან პარლამენტების უმრავლესობა ბურჟუაზიის წარმომადგენლების ხელშია, სენატში ისინი თავიანთ მომხრეებს გზავნიან.

ამბობენ ზედა პალატა საჭიროა იმისთვის, რომ ქვედა პალატას შეცთომები გაუსწოროს, მის ნაუცფათევ გადაწყვეტილებაში მეტი დაკვირვება და სიტყვით შეიტანოს, ერთი სიტყვით, დინჯი და მოფიქრებული მუშაობა აწარმოვოსო. მარა ეს მხოლოდ გულუბრყვილობა მოსატყუებელი საკენკია.

ნამდვილათ კი ჩვენ ვიცით, რომ ეს სიღინჯე და მოთქმება მხოლოდ მაშინ ჩნდება, როცა მუშათა და გლეხთა სასარგებლო კანონების გაჩერება, უარყოფა ან და, თუ ეს შეუძლებელია, გაუარესება და დაგვიანებაა საჭირო გაბატონებულ კლასებისთვის.

ზედა პალატა პროგრესიულ კანონმდებლობის ტორმოზიწ.

როცა კითხვა პრივილეგიურ კლასების დაცვას ეხება ის მას სიხარულით და საჩქაროთ იღებს.

ხოლო მუშათა სოციალურ კანონმდებლობას კი კრიჭაში უდგება.

სამუშაო დღე, მუშების დაზღვევა, პროგრესიულ შემოსავლისდაგვარად განაწილებულ გადასახადებისა შემოღება ქონებაზე, მიწის ღალის შეძვირება და სხვ. ასეთი ყოველთვის აღინჯებს და აფიქრებს ამ პატივცემულ გვამთ.

ზედა პალატა ყოველ სოციალურ კანონმდებლობის მტერია.

იგი ეწინააღმდეგება დემოკრატიულ პრინციპს. იგი მხოლოდ ხარჯს ითხოვს და საქმეს აფუჭებს. ორპალატიანი რესპუბლიკას დემოკრატიული რესპუბლიკა ვერ დაერქმევა.

ამიტომ ჩვენ უარვყოფთ ორ პალატიან სისტემას და მოვითხოვთ ერთ პალატას, ე. ი. ერთ საკანონმდებლო პარლამენტს, საყოველთაო, თანახმობრივ, პირდაპირი და ფარული ხმის მიცემით არჩეულს.

V

რესპუბლიკა შერეზიდენტო.

რა გვაქვს საწინააღმდეგო არჩეულ პრეზიდენტის? განა იგი აუცილებელი არ არის? გაიკვირვებს მკითხველი.

ენახოთ. პრეზიდენტის უფლება წარმოსდგება მეფის უფლებიდან. იქ, სადაც მეფის ტახტი გაუქმებულია, ე. ი. მართვაგამგეობის უფლება მემკვიდრეობით მამიდან შვილზე აღარ გადადის, მეფის მოვალეობას პრეზიდენტი ასრულებს. იგი არჩეული მეფეა.

მას ირჩევს ზოგან პირდაპირ ხალხი, ზოგან საკანონმდებლო საკრებულო; ირჩევს განსაზღვრული ვადით, საფრანგეთში 7 წლით, ამერიკის შტატებში 4-ით მისი უფლებები და მოვალეობები მეტნაკლებია, ზოგან დიდია; ზოგან მცირე, ისე როგორც მეფის. აღვნიშნოთ ზოგიერთი მათგანი: პირველ ყოვლისა პრეზიდენტი ამტკიცებს კანონებს და ამით მონაწილე ხდება საკანონმდებლო მუშაობის მის ნებადაურთველად ვერც ერთი კანონი ძალაში ვერ შევა. და იგი სარგებლობს კიდევ ამ უფლებით და ხშირათ დამტკიცებაზე უარს ამბობს. აი მაგალითით. ამერიკის შტატებს დემოკრატიულ რესპუბლიკას უწოდებენ, ზოგიერთ ბურჟუაზიულ მწერლებს იგი ზეცამდე აყავთ ქებით, და ბევრში მართლაც საქები არის, მაგრამ პრეზიდენტის უფლებები კი მოიკოჭლებს. მისოდენი უფლებები ზოგიერთ ევროპის მირონცხებულ მეფესაც

კი არ მოეპოვება. და აი შედეგები ამის: მარტო ერთმა პრეზიდენტმა გროვეს კლიველენდმა 8 წლის განმავლობაში [იგი ორჯერ იყო პრეზიდენტად] 301 კანონპროექტი, ე. ი. ბილი უარყო, ხალხის წარმომადგენლებისგან მოწონებული. კონსტიტუციის ძალით პრეზიდენტისგან დაწუნებულმა კანონპროექტმა შემდეგ ორი მესამედი ხმა უნდა მიიღოს ორივე პალატაში ე. ი. კონგრესში და სენატი, რომ კანონათ იქცეს. ეს კი იშვიათი მოვლენაა. კლიველენდის მიერ უარყოფილ 301 კანონპროექტში არც ერთი არ ქცეულა ამ გზით კანონათ.

რამდენი შრომა, ენერგია, დრო და ხარჯი დაიკარგა ამ კანონპროექტების შემუშავებაზე და პრეზიდენტმა ერთის კალმის მოსმით გააქარწყლა. და განა შეიძლება ასეთი პრეზიდენტის ყოლა დემოკრატიულ რუსეთში?

გავყვით ქვევით. პრეზიდენტის ხელშია ამასრულებელი ძალა. იგი ნიშნავს მინისტრებს, რომელნიც ზოგან, როგორც მაგ. ამერიკის შტატებში ჩხოლოდ მის წინაშე არიან პასუხის მგებელი, ზოგავე კი, მაგ. საფრანგეთში, პარლამენტის წინაშე, წორეთ ისე, როგორც მონარქიულ სახელმწიფოშია. შემდეგ პრეზიდენტის ხელშია ჯარი. იგი ნიშნავს ჯარის უფროსებს და რასაკვირველია ამ ადგილებს თავის ერთგულთ აძლევს, რომ ჯარი ყოველ შემთხვევისთვის თავის სრულ მორჩილებაში ყოლიოს. ის არის წარმომადგენელი რესპუბლიკის [ცხო სახელმწიფოებთან ურთიერთობაში, იგი აც-

ხადებს ომს და კრავს ზავს, იგი მეთაურობს საიდუმლო დიპლომატიას. თავისთავათ ცხადია ყველა ამ კოთხეებში იგი რამდენიმეთ ყველგან შეზღუდულია, ისე როგორც მეფე. ბოლოს და ბოლოს განსხვავება მასა და მეფის შორის მხოლოდ ისაა, რომ მეფის უფლება მუდმივია, მემკვიდროვებითა, პრეზიდენტის კი ვადიანი, დროებითი. მეფე „ღვთისგან რჩეულია“, პრეზიდენტი კი ხალხისგან.

ამ უკანასკნელ გარემოებაში კი ითვარება ერთგვარი საშიშროება ხალხსათვის. პრეზიდენტი, ასეთი ვითქვამთ, ხალხისგან ნდობით აღჭურვილია და მისი სახელით ლაპარაკობს. განა არ შეუძლია ამ ნდობას დაეყრდნოს და ძალაუფლების სამუდამოთ შენ-რჩუნება მოისურვოს?

მაგალითი ასეთი სურვილისა და მისი განხორციელებისა არა ერთი იცის ისტორიამ. მაგ. ნაპოლეონ მესამემ 1848 წლის რევოლუციის შემდეგ პრეზიდენტობა მიიღო ხალხისაგან. სულ მცირე ხნის შემდეგ კი ხალხის სახელით კონტრ-რევოლიუცია მოახდინა, ჯარის წემწეობით დეპუტატთა პალატა გარეკა და თავი იმპერატორათ გამოაცხადა. საფრანგეთის ხალხმა სრული ოცი წელიწადი ატარა ამ პატარა დესპოტის მძიმე უღელი და მხოლოდ საშინელი ომის და ხელახალი რევოლიუციის შემდეგ მოახერხა ამ ძალათ ტახტზე წამოსკუპებული მეფის იქიდან ჩამოგდება ეს მოხდა 1871 წელს. და მას აქეთ საფრანგეთში რესპუბლიკანური წყობილება დამკვიდრდა. განა სასურველი იძნება, რომ ჩვენც

ასეთი შეკითხვა გავიმეოროთ, და რომელიმე ავანტიურისტი თავზე დავისვათ?

მ:რა ხომ შეიძლება პრეზიდენტი უფლებას მოკლებული იყოს, როგორც ინგლისის მეფე, და მართვა-გამგეობის საქმეში არ ერეოდეს? თეორეტიულათ, რასაკვირველია, შეიძლება. პრაქტიკულათ კი ასეთ პრეზიდენტობას არაერთარი აზრი არ ექნება.

ანდა რისთვის უნდა მოვახდინოთ არჩევნები, გავწიოთ ავტაცია, დავეკარგოთ დრო და ენერჯია? მხოლოდ იმისთვის, რომ ერთ ადამიანს საპატიო და კარგი ჯამაგირიანი ადგილი მოეუპოვოთ?

არა პრეზიდენტი სრულიად ზედმეტია, უარეს შემთხვევაში იგი ხალხის უფლებას ორათ გაყოფს და ხალხის არჩევნებით ზურგ-გამაგრებული, ამავე ხალხს ბატონათ მოევილინება. ამით იზარალებს რასაკვირველია პირველ ყოვლისა მდაბიო, უღარიბესი ნაწილი საზოგადოებისა. გაბატონებულნი და „ძლიერნი ამა ქვეყნისანი“, რომელნიც მეფის გარშემოც ითბობდენ ხელს, მის გარშემოც ადვილათ მოიკალთებენ; მათ ათასგვარი საშვალეება მოეპოვებათ მის გულის მოსაგებათ და თავის ნება-სურვილზე დასამორჩილებლათ. საუკეთესო შემთხვევაში კი იგი ზედმეტ ხარჯებს გამოიწვევს, მისი პარადები, სასახლეები, მეჯლიშები და სხვ. ხალხის ჯიბეს დააწვეება ტვირთათ.

ცხადია პრეზიდენტი გამოადგება ბურჟუაზიას და არა მუშათა კლასს, არა ფართე დემოკრატიულ საზოგადოებას.

მარა შეიძლება უამისოთ რესპუბლიკის არსებობა?

სულ იოლათ. აი მაგილითები. შვეიცარიის რესპუბლიკას პრეზიდენტი არა ყავს, მარა ამით არაფერი არ დაშავებია. მის მაგიერობას იქ ფედერალური საბჭოს (ჩვენებური სამინისტროა 7 კაცი-საგან შემდგარი) თავმჯდომარე ასრულებს, რომელსაც საბჭო თითო წლის ვადით ირჩევს თავის წრიდან. ეს თავმჯდომარე მხოლოდ საბჭოს კრების ხელმძღვანელია და ამიტომ არაფითარი განსაკუთრებული უფლებები და მოვალეობები არ აქვს.

მართვა-გამგეობის საქმეებს საერთოთ მთელი საბჭო უძღვება. მეორე მაგალითი დღევანდელი რუსეთია. დღეს ჩვენ არც მეფე გვყავს და არც პრეზიდენტი არის მხოლოდ დროებითი მთავრობა სამინისტროს სახით, რომელსაც ერთი მინისტრთაგანი თავმჯდომარეობს. ქვეყნის მართვა-გამგეობისთვის ეს სრულიათ საკმარისია, მიუხედავათ იმისა, რომ ჩვენში დღეს გარეთ ომისა და შიგნით მოუწყობლობის გამო მდგომარეობა მეტათ რთული და დახლართულია. ცხადია, თუ დღეს, ამ გადამავალ ხანაში არაა საჭირო პრეზიდენტი, შემდეგში, როცა ცხოვრება ნორმალურ კალაპოტში ჩადგება მით უმეტეს აღარ დაგვეჭირდება ის.

ამიტომ ჩვენ ამ თავითვე უნდა დავავალოთ ჩვენ დეპუტატებს, რომელთაც დამფუძნებელ კრებაში გავვზავებით, რომ რუსეთის ძირითად კანონებში პრეზიდენტს ადგილი არ ექნეს.

ჩვენ გვინდა რესპუბლიკა უპრეზიდენტო.

VI.

პარლამენტი. რეპრეზენტები. ინსტიტუტები-

როგორი უნდა იყოს საკანონმდებლო ორგანიზაცია?

რაც შეიძლება მარტივი და სადა. ყველაზე უკეთესი და სწორია ხალხის პირდაპირი მონაწილეობა კანონმდებლობაში ე. ი. კანონის შემუშავებას და გამოცემაში. ასეთი, წესი განხორციელებულია შვეიცარიის ზოგიერთ კანტონებში (პროვინციებში). ამ კანტონებში დაახლოებით 20—30 ათასი მცხოვრებია. წელიწადში ერთხელ ეს ხალხი იყრის თავს და ადგენს საჭირო კანონებს. ირჩევს მთავრობის მოხელეებს და სხვ. კრება მოედანზე ხდება. და საცა უფროსები კანონმდებლობენ მოზრდილი თაობა ზევით მაღლობზე დამსხდარი უყურებს და გამოცდილებას იძენს. ამას ეწოდება პირდაპირი კანონმდებლობა და ასეთი წესი ყველაზე უფრო დემოკრატიულია. ის ხალხის სურვილს და ნებას ყველაზე უფრო სწორათ და უტყუარად გამოხატავს.

მარა თვალ უწვდენელ რუსეთში, სადაც მრავალი მილიონი ხალხი ცხოვრობს, ეს ყოველად შეუძლებელია. ერთად ერთი საშვალეობა კანონმდებლობისა ჩვენში არის წარმომადგენლების (დეპუტატების) საშვალეობით კანონმდებლობა. ამ შეთხვევაში ხალხი თვითონ პირადათ არ სარგებლობს თავის უზენაეს უფლებებით, არამედ ანდობს მას თა-

ვის არჩეულ დეპუტატებს, ე. ი. პარლამენტს რომელიც მისი ნებით და სახელით მოქმედებს.

ამნაირათ ჩვენ, სოციალდემოკრატები; ვამბობთ, რომ კანონმდებლობის უფლება უნდა მიეცეს ხალხის არჩეულ დეპუტატებს, რომელნიც შეადგენენ ერთ პალატას, ან ერთ პარლამენტს.

ამ ერთ პარლამენტში იქნებიან, ერთათ თავმოყრილი წარმომადგენლები ყველა კუთხის და გუბერნიის, ე. ი. მთელი რუსეთის და ამიტომ მათ სიტყვას დიდი მნიშვნელობა და გავლენა ექნება.

ჩვენ, სოციალდემოკრატები, ვერ დავმალავთ ხალხისაგან იმ გარემოებას, რომ არჩეული ხალხი, როგორი საარჩევნო წესიც უნდა შემოვიღოთ, მაინც ვერ იქნება უნაკლულად გამომხატველი ხალხის ნამდვილი ნება-სურვილის.

არჩეული ყოველთვის განირჩევა ამრჩეველთაგან. წინდაწინ გათვალისწინება ყოველივე საკითხის, რომელიც ცხოვრებაში წარმოდგება, შეუძლებელია. ცხადია შეუძლებელია არჩეული პირისთვის წინდაწინვე თავის აზრის დაბარება. ამ ნაკლის ავისებს პარტიათა არსებობა. პარტიას აქვს განსაზღვრული პროგრამა და მისი წევრნი ამ პროგრამის მიხედვით მოქმედებენ: მათ თვით პარტია უწევს კონტროლს და ხელმძღვანელობს. ამ მხრით ყოველთვის უმჯობესია არჩევა პარტიულ კაცის, ვინემ უპარტიოსი, რომელიც სხვის წინაშე პასუხისმგებელი არ არის.

მარა მარტო ეს არ კმარა. და ხალხს საშეა-

ლება უნდა ექნეს თავის არჩეულ დეპუტატებს თვალყური ადევნოს და საჭიროების დროს პასუხი მოსთხოვოს. ამით ის მას ნებას არ მისცემს დავალეულ გზიდან გადაუხვიოს და ხალხის ინტერესებს უღალატოს.

საჭიროა პირდაპირი კანტროლი ამრჩევლების არჩეულებზე...

თუ დეპუტატების ხელშეუხებლობა დაირღვა, იგი კანონმდებელ ძალათ არ გამოდგება, მაშინ მისი ბედი გამომძიებელის და პროკურორის ხელში იქნება. ამით შეეძლება ხალხის არჩეულთ ბრალი დასდონ, დაატუსაღონ და ასე ხალხის საქმეს ზიანი მოუტანონ.

ამიტომ დეპუტატების ხელშეუხებლობის პრინციპი სავსებით დაცული უნდა იქნეს. დეპუტატის სამართალში მიცემა შეუძლია მხოლოდ თვითონ პარლამენტს. რა გზით შეიძლება ამის განხორციელება?

ხალხს კი კანტროლის გასაწევად სხვა საშვალეება უნდა მიეცეს. ერთი ასეთი საშვალეებათაგანია მოკლე ვადიანი პარლამენტი. ყოველ ორ წელში პარლამენტი უნდა ხელ ახლა აირჩეს. აქ დეპუტატი წარსდგება თავის არჩეულების წინაშე და თავის მოქმედებაში პასუხს აგებს. თუ ხალხის სასარგებლოთ არ უმოქმედნია—მას, ცხადია, ხელახლათ აღარ აირჩევენ. თუ პარლამენტი დიდი ხნის ვადით, მაგ. 4—5 წლით იქნა არჩეული, დეპუტატს შეუძლია, თუ სვინიდიის გადაუდგა, ხალხს დიდი ზიანი მიაცენოს.

ამიტომ ჩვენ გვინდა პარლამენტი ორი წლის ვადით არჩეული: ნაკლებ ვადით არჩევა რომ შემოვიღოთ, მაგ. ყოველწლიური, იმ შემთხვევაში უმეტესი დრო საარჩევნო აგიტაციას და კენჭის ყრას მოუნდება; საკანონმდებლოთ კი ნაკლები დრო დარჩება. ხალხისთვის არც ესაა გამოსადეგი.

შემდეგ პარლამენტი უნდა იქნეს ერთთ ერთი საკანონმდებლო დაწესებულება, რომლის გადაწყვეტილებას არავითარი დამტკიცება არ ესაჭიროება. ხოლო მისი დადგენილებები სისრულეში მოყავს სამინისტროს, რომელიც მის წინაშე პასუხისმგებელია. ამავე სამინისტროს ევალება კანონპროექტების შემუშავება და დასამტკიცებლათ პარლამენტისათვის წარდგენა. ამ რიგათ პარლამენტი უზენაესი ძალა-უფლებით აღჭურვილი დაწესებულებაა, რომელიც მთელი ხალხის და სახელმწიფოს სახელით მოქმედებს და ლაპარაკობს.

მის ხელშია ყველა მიმდინარე საქმეების გადაწყვეტა.

ზოგიერთ საბედისწერო და უმნიშვნელოვანეს კითხვების გადასაკრელათ, როგორც, მაგ., ომის გამოცხადებაა, აუცილებელია ამასთანავე მიღებულ იქნას ხალხისათვის პირდაპირი შეკითხვა, ე. ი. რეფერენდუმი.

რეფერენდუმი იმაში მდგომარეობს, რომ დასმულ კითხვაზე ყველა სრულწლოვანი მოქალაქე აძლევს თავის პასუხს. მაგ. ავიღოთ ომი. ისმება კითხვა: გამოეცხადოს თუ არა ომი გერმანიას? თვი-

თეული მოქალაქე ამაზე უპასუხებს ან „ჰო“-ს, ან „არა“-ს. სხვაგვარი პასუხი შეუძლებელია. შემდეგ ხმებს დათვლიან და რასაც უმეტესი ნაწილი გადა-
 კრის, ცხოვრებაში ის იქნება გატარებული. შევი-
 ცარიში, რომელიც პატარა რესპუბლიკაა, ასეთი
 უფლება აქვს ხალხს და იგი საკმაოდ ხშირათა-
 სარგებლობს ამ უფლებით, თუ მცხოვრებთა 30,000
 მოისურვებს ნაციონალური საბჭო ვალდებულია ყო-
 ველი კითხვა ხალხს გადასცეს. პირდაპირი კენჭის
 ყრით, რეფერენდუმით გადასაწყვეტათ.

რუსეთი მეტათ დიდი და მრავალრიცხოვა-
 ნია, მარა უმთავრეს კითხვებში ასეთი უფლების
 განხორციელება აქაც შეიძლება. ამიტომ კონსტი-
 ტუციაში ეს უფლებაც უნდა იქნეს აღიარებული
 კანონმდებლობის ხალხის სურვილის თანახმათ
 წასაყვანათ, საჭიროა აგრეთვე ხალხს ექნეს ინიცია-
 ტივის, ე. ი. თაოსნობის უფლება. ინიციატივა გა-
 მოიხატება შემდეგში: ყოველ მოქალაქეს უფლება
 აქვს კანონპროექტი შეიმუშაოს ამა თუ იმ საკითხ-
 ზე და თუ მას ვთქვათ 100,000 კაცი ან რამდენიც
 იქნება დადგენილი ხელს მოუწერს, პარლამენტი
 ვალდებული იქნება ეს კანონპროექტი განიხილოს
 და მაზე თავისი პასუხი გამოსთქვას.

თუ მცხოვრებთა განსაზღვრული ნაწილი, ვთქვათ
 200 ან 300 ათასი კაცი მოითხოვს, კანონპროექტი
 შეიძლება ხალხს გადაეცეს რეფერენდუმის საშვალებით
 გადასაწყვეტათ... მხოლოდ ასეთ პირობების შე-
 მოღებით შეიძლება სახელმწიფო წყობილებას ნამ-

დვილი დემოკრატიული ხასიათი მიეცეს და ხალხის ინტერესები დაცულ იქნეს...

VII

ადგილობრივი პარლამენტები.

რუსეთი დიდი და ვრცელი ქვეყანაა. მას დედამიწის მეექვსედი ნაწილი უჭირავს. ამ უსაზღვრო სივრცეზე მრავალი ერი და ტომი ცხოვრობს, თვითეულ მათგანს აქვს თავის ისტორია, ხასიათ-ზნეჩვეულება, კულტურა, ენა და სხვ. ამას გარდა სხვა და სხვა კუთხეები ამ ვეებერთელა ქვეყნისა დიდათ განირჩევიან ერთი მეორისაგან ადგილობრივ ეკონომიურ ცხოვრების პირობებით და მდგომარეობით: ციმბირი, კავკასია, მცირე რუსეთი, შიდა—ანუ დიდი რუსეთი, ფინლიანდია, ბალტიის მხარე და სხვ. ყველა ამ განსაკუთრებული კუთხეების და აქ მცხოვრები ერების საჭიროებათა დაკმაყოფილება, მათი განსაკუთრებულ პირობებთან შეთანხმებულათ მოქმედება აუცილებლათ თხოულობს ამ ადგილებში საოლქო და ეროვნულ პარლამენტების დაარსებას, რომელიც არჩეული იქნება ყველა ადგილობრივ მცხოვრებთაგან განუზრჩევლათ სქესისა და ეროვნებისა თანასწორი, ფარული და პირდაპირი ხმის მიცემით და პროპორციონალური წარმომადგენლობით.

ამ პარლამენტების მოვალეობა იქნება ადგილობრივი საჭიროებათა მოწესრიგება. ხოლო მის კომპეტენციას ე. ი უფლებებს დაწვრილებით გან-

საზღვრავს სრულიად რუსეთის დამფუძნებელი კრება. რუსეთის ძირითად კანონებში ე. ი. კონსტიტუციაში ამ ადგილობრივ პარლამენტების ფარგლები, მათი სამოქმედო ასპარეზი ყველგან ერთგვარი არ იქნება, ამიტომ მისი წინასწარ განსაზღვრა ყველასათვის შეუძლებელია... უნდა ავლნიშნოთ მხოლოდ, რომ ამ პარლამენტებს დაევალება ეროვნულ კულტურის, ენის დაცვა და ადგილობრივ წარმოების განვითარებისთვის ხელის შეწყობა და სხვ. მას უნდა ეყოს თავის ამასრულებელი ორგანო, რომელიც ადგილობრივ პარლამენტის ყველა დადგენილებებს ცხოვრებაში გაატარებს. მას დაევალება აგრეთვე ცენტრალური მთავრობის ყველა დადგენილებათა სისრულეში მოყვანა, რისთვისაც მის განკარგულებაში იქნება ადგილობრივი ადმინისტრაცია და მოხელეები.

ამნაირათ ადგილობრივი პარლამენტი ასე ვთქვათ ცენტრალურ სრულიად რუსეთის პარლამენტის ადგილობრივი განყოფილებაა, მისი დამხმარე, მისი საქმის ადგილობრივ გამგრძელებელი. ყველა ძირითადი და პირობითი კითხვები სახელმწიფოს მთლიანობის, მის ეკონომიურ და პოლიტიკურ განვითარების, კანონმდებლობა სოციალური და ადმინისტრაციული, დაწესება სამოქალაქო და სისხლის სამართლისა, სავაჭრო კანონების უცხო სახელმწიფოებთან კავშირის დაჭერა, საზღვრების დაცვა და სხვ. დაევალება სრულიად რუსეთის პარლამენტს და მის სამინისტროს.

ამნაირათ კანონმდებელი დაწესებულება, მართვა-გამგეობის უზენაესი უფლებით აღჭურვილი—ეს პარლამენტია, ე. ი. ხალხის არჩეული დეპუტატების კრებული. საერთო სახელმწიფო საქმეებს განაგებს სრულიად რუსეთის პარლამენტი, ადგილობრივ საქმეებს—კი ადგილობრივი. პირველს ირჩევს მთელი რუსეთის ყველა სრულწლოვანი მცხოვრები. მეორეს კი - ადგილობრივი მცხოვრებნი, რომელთაც ის განსაკუთრებით ემსახურება.

VIII.

ამასრულებელი კალა, მეფე და პრეზიდენტი. უახსუსისეგვებელ საშინისტრო.

გადავიდეთ ახლან ამასრულებელ ძალთა ორგანიციის საკითხზე. ყოველ დადგენილებას, კანონს, შესაფერი ამასრულებელი ესაჭიროება. ძველ რუსეთშიაც ზოგიერთი, განსაკუთრებით სამოქალაქო კანონი მეცნიერების უკანასკნელი სიტყვის თანახმათ იყო შემუშავებული, მარა მისი ასრულება მეფისგან დაყენებულ ბიუროკრატებს ევალებოდა და ეს უკანასკნელნი კი მხოლოდ მის გადაუკუღმართებას ემსახურებოდენ, წალმა დაწერილს, უკუღმა კითხულობდენ და ასე ხალხის მაგიერ მხოლოდ თავისიანთ ექომაგებოდენ. ცხადია ამასრულებელ ძალის შედგენა არც ისე უმნიშვნელო საქმეა.

თითქმის ყველა დღემდე არსებულ სახელმწიფოებში ამასრულებელი ძალა ეკუთვნის: 1) მეფეს

ან პრეზიდენტს, 2) სამინისტროს და 3) ადგილობრივ დაწესებულებებს:

როგორია ჩვენი შეხედულება ამ დაწესებულებებზე?

პირველი და უმთავრესია, რასაკვირველია, უმაღლესი ამასრულებელი ძალა. ეს კარგათ ესმით გაბატონებულ კლასებს და უპასუხისმგებლო მეფეთა დამქაშებს.

მონარქიულ წყობილებაში უზენაესი ამასრულებელი ძალა ეკუთვნის მეფეს, კაროლს; ამ რიგათ იგი კანონმდებლობაში მონაწილეობის გარდა, ასრულებს ხელმძღვანელობასაც კისრულობს და ამით თავის საკუთარ ძალას და მნიშვნელობას აორკეცებს.

სახელმწიფო ორგანიზაცია იძულებითი პრინციპზეა აშენებული. იგი თავის დადგენილებებს ცხოვრებაში ძალით ატარებს, თუ ნებით ვერ განახორციელა. ამაშია მისი განსხვავება სხვა თავისუფალ ორგანიზაციებისაგან, მაგ., პარტიების, კავშირების და სხვათაგან. ძალით რაიმეს გატარება კი თხოულობს, რომ სახელმწიფოს ხელში იყოს ჯარი, მას მორჩილებდეს ადმინისტრაცია, პოლიცია და სხვ..

და რაკი ამასრულებელი ძალა მეფის ხელშია, ეს ძალადობის ორგანიზაციებიც მას ექვემდებარება. იგი ნიშნავს მინისტრებს, მოხელეებს, მოსამართლეებს, ჯარის უფროსებს და სხვ. ეს მას საშვალებას აძლევს

ხალხის ინტერესებს ყურადღება ნაკლებათ მიაქცი-
ოს და მას თავის ნება-სურვილი თავზე მოახვიოს.

ინგლისის ხალხი, როგორც წინეთ მოვიხსენ-
იეთ, 7 საუკუნე ებრძოდა თავის მირონცხებულს,
რომ უკანასკნელისთვის ეს უფლებები ჩამოერთმია
და მისთვის მხოლოდ მეფის წოდება დაეტოვებია.
ამიტომ ინგლისში ასეთი თქმულებაა: „მეფე—მე-
ფობს, პარლამენტი განაგებს“.

რესპუბლიკანურ წყობილებაში ამასრულებელი
ძალა პრეზიდენტის განკარგულებაშია და ეს მასაც
ისეთივე უფლებით მოსავეს, როგორც მეფეს მონარ-
ქიაში. ეს ერთი მთავარი მიზეზია იმის, რომ ჩვენ
წინააღმდეგი ვართ როგორც მეფის, ისე პრეზი-
დენტისაც.

ხალხის ინტერესები თითქმის თანაბრათ დაი-
ჩაგრება როგორც ერთის, ისე მეორის ხელში.

მეფე-პრეზიდენტებს შემდეგ ამასრულებელი
ძალა ეკუთვნის მინისტრებს.

თუ სახალხო წარმომადგენლობა, ე. ი. პარლა-
მენტი, რაიმე უფლებით არ არის აღჭურვილი
რომ მათი დამორჩილება და თავის ნებაზე წაყვანა
შეეძლოს, ამასრულებელი ძალა ყოველთვის ხალხის
წინააღმდეგ თვითმპყრობელურათ მიმართულ იქნება.

თუ მაგ., მეფე ნიშნავს მინისტრებს და უკა-
ნასკნელნი მის წინაშე არიან პასუხის მგებელნი და
არა ხალხის წარმომადგენლების წინაშე, ექვი არაა,
უკანასკნელნი თავის მოქმედებაში დამოკიდებულნი

იქნებიან მის ნება სურვილზე და მხოლოდ იმ მცირედი ჯგუფის ინტერესებს ემსახურებიან, რომელნიც სასახლეს გარშემო ახვევია და რომელსაც კამარილია ეწოდება. ეს მაღალი არისტოკრატიის და მსხვილ ფინანსიურ ბობოლების უპასუხისმგებლო ბატონობაა, და მეფის ნახევრათ—თვითმპყრობელობა პოლიტიკური ფორმაა. ამათი ბატონობის.

ხალხის წარმომადგენლობას ამ შემთხვევაში მეორე ხარისხოვანი ადგილი უჭირავს. იგი შეზღუდულია კანონმდებლობაში მეფის სურვილით, და სრულიად უძლურია დაკანონებულის ასრულებაში. ყოველი მოხელე ამიტომ თავს ხალხის ბატონათ გრძნობს და მის ზურგზე მალაყს გადადის.

მარა მარტო მონარქიებშიც არ ვხვდებით უპასუხისმგებლო მინისტრებს, რესპუბლიკანური წყობილებაც ზოგიერთგან არ უშლის ხელს ასეთ წესების არსებობას. მაგ., ჩრდილოეთ ამერიკის შეერთებულ შტატებში. აქ პრეზიდენტი თვითონ ნიშნავს მინისტრებს, რომელიც მხოლოდ მის წინაშე არიან პასუხისმგებელნი... ცხადია ასეთ პირობებში რესპუბლიკა არათერთი ჩამოუფარდება მონარქიას. ორივე ბიუროკრატიულია და მოხელეთა ზნეობრივ გახრწნილების ბუდეთ არის გადაქცეული. ამერიკის მოხელეთა გათახსირება ამ მხრით რუსეთის ძველი რეჟიმის მსახურთ არ ჩამოუფარდება. ერთგვარი მიზეზები ქმნის ერთგვარ შედეგებს.

IX

კ ა რ ლ ა მ ე ნ ტ ა რ ი ზ მ ი .

ბურჯუაზიულმა აზროვნებამ ბოროტების წინააღმდეგ მხოლოდ ერთი საშვალეა იცის.—ესაა პასუხისმგებელი სამინისტროს სისტემა, ანუ პარლამენტარიზმი

რაში მდგომარეობს ეს სისტემა?

სამინისტროს ნიშნავს მეფე, ან პრეზიდენტი, მარა იგი პასუხისმგებელია პარლამენტის წინაშე. ასეთი სამინისტრო მანამდე ასრულებს თავის მოვალეობას, სანამ მას პარლამენტის უმრავლესობა მხარს უჭერს და ნდობას უცხადებს. თუ ეს ნდობა დაკარგა, უნდა სამსახურიდან გადადგეს. ამნაირათ, მეფის ან პრეზიდენტის არჩევანი შეზღუდულია. იგი იძულებულია სამინისტრო ისეთ პირთაგან შეადგინოს, რომელნიც პარლამენტში უმრავლესობის თანაგრძნობას მოიპოვებენ. ჩვეულებრივათ ასეთ შემთხვევაში ნიშნავენ ერთ პირს—პრემიერს, რომელიც შემდეგ თვით ირჩევს დანარჩენ ამხანაგებს და ადგენს კაბინეტს.

ამნაირათ, პარლამენტს საშვალეა ეძლევა სამინისტრო რამდენიმეთ მაინც მორჩილებაში იყოლიოს და თავის ნება ასრულებიოს.

ასეთ წყობილებას, ეწოდება პარლამენტარიზმი, ე. ი. პარლამენტის მეთაურობა.

ასეთი წესი არსებობს მაგ., სატრანგეთში და ზოგიერთ პატარა მონარქიულ სახელმწიფოებში.

ცხადია პარლამენტარიზმი ბევრათ უმჯობესია უპასუხისმგებლო სამინისტროს სისტემაზე, სადაც სამინისტრო დეპუტატების უნდობლობას ხშირათ ბუზათაც არ იმჩნევს და მაინც თავისას განაგრძობს.

მარა პასუხისმგებელი სამინისტროც ვერ არის სრულიად უნაკლულო და დემოკრატიის შესაფერი.

პირველი ის, რომ იგი უეჭველათ გულისხმობს მეფეს ან პრეზიდენტს, ე. ი. უსარგებლო და მავნე თანამდებობას.

მეორეც ის, რომ ამ შემთხვევაში პარლამენტი იმორჩილებს მინისტრებს არაპირდაპირი გზით, უნდაბლობის გამოცხადებით, კანონპროექტის უარყოფით და სხვ. ერთი სიტყვით, საკანონმდებლო მუშაობის შეფერხებით. შემდეგ მინისტრების გადაყენებისა—იგი უმწეოთ დგას და უცდის ახლების დანიშვნას, რომ იგიც უარყოს, თუ არ მოეწონება. ჯგუფურ და პირადულ პოლიტიკას, ამა თუ იმ მინისტრის სახელის გატეხას და ასე მთელი კაბინეტის დაცემას და სხვ. ამ სისტემის დროს ნოყიერი ნიადაგი ეძლევა.

ზოგიერთ პოლიტიკურ მოღვაწეთ ეს სპეციალურ ხელობათ აქვთ გადაქცეული, მაგ. საფრანგეთში კლემანსო ცნობილია, როგორც მინისტრების ჩამომგდები. ამას გარდა სამინისტროს ყოველთვის აქვს საშვალეობა პარლამენტს უნდობლობის გამოცხადება არ დააცალოს. ამისათვის მოითხოვს პრე-

ზიდენტისა ან მეფისაგან პარლამენტის დათხოვნას და ხელახალ არჩევნების დანიშნავს, რომლის დროსაც სახელმწიფო მოხელეების საშვალებით ცდილობს ხალხს ძალა დაატანოს და თავის მომხრე დეპუტატები აარჩევოს.

ამნაირათ აქ სამინისტრო სავსებით პარლამენტზე დამორჩილებული არაა. იგი ბევრ რამეში სრულ დამოუკიდებლობასაც იჩენს და ხშირათ ოვით ხალხის წარმომადგენლებს იმორჩილებს.

საერთაშორისო დიპლომატიურ მიწერ-მოწერას, ფარულ ხელშეკრულებებს, იგი პარლამენტის დაუკითხავათ აწარმოებს და სხვ. ერთი სიტყვით, მას ბევრი საშვალეა აქვს ხალხის წარმომადგენლებთან საბრძოლველათ და ხალხის ინტერესების წინააღმდეგ სამოქმედოთ.

და ეს იმიტომ რომ სისტემა სამინისტროს დანიშვნის აქაც დაცულია და პარლამენტს მხოლოდ არაპირდაპირი გავლენა აქვს მის შემადგენლობაზე. მას შორიდან მოვლა სჭირდება სამინისტროს დასამორჩილებლათ. ეს მაღალკლასებს საშვალეებს აძლევს მართვა-გამგეობაზე თავის გავლენა გააძლიეროს და ხალხის, ფართო მასის, ინტერესები დაჩაგრონ, ხალხის არჩევნების ძალა გააბათილონ.

ამიტომ პარლამენტარიზმი ბურჟუაზიის მოთხოვნილებაა, მისი ბატონობის პოლიტიკური ფორმაა.

ლიბერალები, პროგრესისტები და სხვ. ბურჟუაზიული პარტიები ამით სავსებით კმაყოფილდებიან.

მარა დემოკრატიის ინტერესებისთვის ეს საკ-
მარისი არ არის.

XI.

არჩეულ მინისტროს და დემოკრატია.

ჩვენ ვართ მომხრე ხალხის და მისი არჩეული
პარლამენტის სრულ უფლებიანობის. მინისტრების
ზევიდან დანიშვნა კი მათ უფლებებს ზღუდავს და
ამცირებს, იგი ხალხს ართმევს თავის ხელუხლებელ
უფლებას, თავის საქმის წაყვანაზე პირდაპირი გავ-
ლენა იქონიოს.

ამიტომ ჩვენ უარვყოფთ მინისტრთა დანიშვნის
სისტემას, სულ ერთია, პასუხისმგებელი იქნება
იგი, თუ უპასუხისმგებლო.

სოციალდემოკრატია, როგორც დამცველი
ხალხის ინტერესების, აყენებს სულ სხვა პრინციპს.
ესაა პრინციპი მინისტრთა არჩევის.

ჩვენ გვინდა სამინისტრო თვითონ პარლა-
მენტისაგან არჩეული და მის წინაშე პასუხის-
მგებელი...

როგორც საკანონმდებლო, ისე ამასრულებელი
ძალის უზენაესი-მატარებელი ასეთ პირობებში
თვით პარლამენტია და იმის საშვალეებით მთელი
ხალხი.

პარლამენტის ხელშია საკითხი ომის და ზავის,
იგი აწარმოებს საგარეო პოლიტიკას, მას ექვე-
მდებარება შვიარაღებული ძალა და სარდლები, რო-

შელთაც მის ნებადაურთველათ ვერვინ გამოიწვევს*) იგი ნიშნავს მოხელეებს, ერთი სიტყვით. ასრულებს იმას, რასაც მონარქიაში მეფე აკეთებდა. იგი აძლევს აგრეთვე შესაფერ დირექტორებს თავის არჩეულ მინისტრებს, ისმენს მათგან ხანგამომშვებით, სისტემატიურათ, მაგ, ყოველ 6 თვეში ერთხელ, მოხსენებებს შართვა-გამგეობის შესახებ შეაქვს საჭირო შესწორებები მათ მუშაობაში და სხვ.

მცირედ უიანხმოების დროს ასეთ არჩეულ პირების გადაყენებას საჭიროება სულაც არ მოითხოვს. საკმარისია სამინისტრომ დირექტივები ყურადიღოს და შემდეგ სისრულეში მოიყვანას. შეეცადოს გამოცვლა მათი აუცილებელი შეიქმნება მხოლოდ იმ შემთხვევაში, თუ პრინციპიალური წინააღმდეგობა აღმოჩნდა პარლამენტებსა და სამინისტროს შორის.

ამრიგათ კანონმდებლობა და საერთოთ მართვა-გამგეობაც ნორმალურათ და ხელშეუშლელათ ივლის. სამინისტროსაც უფრო მტკიცე ნიადაგი ექნება. ასეთი სამინისტრო უფრო ამასრულებელი

*] მაგ. შვეიცარიაში სამინისტროს შეუძლია, თუ ნაციონალური საბჭო [პარლამენტი] არ მუშაობს და ამ დროს საჭიროებამ მოითხოვა, თავის განკარგულებით გამოიწვიოს 2000 მდე ჯარის კაცი და ისიც მხოლოდ ორი კვირის ვადით თუ მეტი სალდათი სჭირია, ან მეტი ვადით, უნდა დაუყონებლივ პარლამენტი მოიწვიოს და ნებართვა ითხოვოს.

კომისია, ვინემ ევროპიული სახელმწიფოთა სამინისტრო.

დასკვნა: ცენტრალური მთავრობა შესდგება პარლამენტისაგან, ე. ი. ხალხის მიერ არჩეულ დეპუტატთა კრებულისაგან, რომელიც თავის მხრივ ირჩევს ამასრულებელ ორგანოს—სამინისტროს. ერთი მინისტრთაგანი თავმჯდომარეთ ითვლება, მარა მას არავითარი უპირატესობა არ აქვს, გარდა თავმჯდომარეობისა.

ცხადია ასეთ სამინისტროს გამოცვლა ყოველთვის შეიძლება. მარა კიდევ რომ არ გადააყენონ, მისი არსებობის ვადა თვით პარლამენტის არსების ვადას, ე. ი. 2 წელიწადს ვერ გადასცილდება. ორი წლის შემდეგ ახალი პარლამენტი შესდგება და იგი თავის სამინისტროს აირჩევს.

შვეიცარიაში, სადაც ასეთი სისტემაა განხორციელებული, არსებობს კიდევ ერთი საყურადღებო წესი. თავმჯდომარე ირჩევა მხოლოდ ერთი წლის ვადით. მეორე წელიწადს ამავე პირის არჩევა თავმჯდომარეთ აღკრძალულია. მიზეზი ამის ცხადია. ერთი და იგივე პირის არჩევა ყოველწლიურათ ადვილათ შეაჩვევდა თავმჯდომარეს პრეზიდენტის უფლებისკენ ხელის წაპოტანებას, ე. ი. ძალა უფლების ხელში ჩაგდებას.

ამიტომ შვეიცარიის წესი ამ შემთხვევაში საესებით სწორი და დემოკრატიულია.

ასეთია მოკლეთ ცენტრალური ამასრულებელი ძალის ორგანიზაცია დემოკრატიული წყობილებაში.

XII.

ადგილობრივი თვითმმართველობა.

ვინ უნდა იყოს ცენტრალური მთავრობის განკარგულებათა ამასრულებელი ადგილობრივი?

ეს კითხვა არც ისე უბრალო და უმნიშვნელოა. მინისტრები შორსაა, ადგილობრივ ხალხთან კი პირდაპირი დამოკიდებულება იმათ აქვთ, ვინც ამათ ბრძანებას და მოწერილობას ასრულებს. ძველი რეჟიმის დროს ასეთები იყვნენ გუბერნატორები, მაზრის უფროსები, ბოქაულები და სხვ. მსხვილი და წვრილი მოხელეები, მაღლიდან, მთავრობიდან, დანიშნული და მათზე დამოკიდებულნი. ამიტომ ისინი უფროსთა წინაშე წელში ოთხათ იკვაკებიან, თავის ხელქვეითნი კი ცის რისხვით ევლინებოდენ. ხალხზე ხომ ძველ ფეოდალივით ბატონობდენ დამას თვის საწველ ფურათ იხდიდენ.

ცხადია ახალწყობილებაში ასეთი წესები ვერ დარჩება. ხალხი ერთათ ერთი ბატონ-პატრონია სახელმწიფოსი, იგია უმაღლესი მბრძანებელი და მსაჯული. და ის უნდა იყოს ბატონ-პატრონი ადგილობრივი ამასრულებელ ორგანოებშიაც.

როგორ შეიძლება ეს?

იმავე საშვალეებით, რომლის მეოხებითაც ცენტრალური მთავრობა—ხალხზე დამოკიდებულნი, ე. ი. არჩევნებით.

ამიტომ ჩვენ ვთხოულობთ, რომ ადგილობრივი

დაწესებულებები, გუბერნიის, მაზრის, საბოქაულო-სი და სხვ., რომელნიც მართვა-გამგეობის ორგანოებათ ითვლებიან, და მთავრობის განკარგულებით ცხოვრებაში გატარება აქვთ დაკისრებული, ხალხისგან არჩეული და მისი ნდომით აღჭურვილი იყოს, ისე როგორც ცენტრალური დაწესებულებები.

თვითმპყრობილობის დროს ადგილობრივ მრავალი ერთი მეორის მოქიშვე და განკერძოვებული ორგანოები იყო, სადაც ხალხის ცხოვრებაში დიდი არევე-დარევა, შექონდა. დღეს ასეთი წესი უნდა უარყოფილ იქნეს. ჩვენის აზრით, ადგილობრივ სრულიად საკმარისია ერთი დაწესებულების არსებობა, თვითმართველობის ქალაქებში და ერობის სოფლებში, რომელნიც საყოველთაო თანასწორი, პირდაპირი და ფარული კენჭის ყრით იქნება არჩეული.

თავის მოქმედების ფარგლებში ამ ორგანოების მდგომარეობა ისეთივე დამოუკიდებელი უნდა იყოს როგორც ცენტრალურ მთავრობის. მისი მთავარი კანტროლი და გამსწორებელი მხოლოდ ხალხია, კანონი და სამართალი. სხვა ძალას უფლება არა აქვს მის მუშაობაში ხელი აფათუროს.

ამას განსაკუთრებით დიდი მნიშვნელობა აქვს მუშათა კლასისთვის და საზოგადოთ მცხოვრებთა ღარიბი ნაწილისათვის.

ცენტრალურ მთავრობაში, რომელიც მთავალი რუსეთის წარმომადგენელია, ექვი არაა, გაბატონებული ბურჟუაზიული კლასი იქნება.

ადგილობრივ თვითმართველობებში კი ყველგან არა. იქ, სადაც მუშათა ცენტრია, ე. ი. ქარხანათაბრიკები მუშაობს, იქ სადაც დემოკრატია შეგნებულათ ეწევა თავის მუშაობას ასეთი თვითმართველობები ამ დემოკრატიის ხელში ჩავარდება, წარმოამადგენლების უმრავლესობა მათი იქნება. მთავრობის ზეგავლენას შეუძლია მათ დემოკრატიულ მოღვაწეობას და დადგენილებებს ფრთა შეაკვეცოს, აკრძალვა დაადვას და ასე მოწინავე დემოკრატია ჩამორჩენილ ნაწილებს გაუთანასწოროს, რაც ხალხისათვის საზარალოა. ამიტომ ჩვენ ასეთ ზეგავლენის წინააღმდეგი ვართ. ცენტრალური მთავრობა თავის მოვალეობებს ასრულებს, ადგილობრივი თავისას. მათი ფუნქციები (საკეთებელი საქმეები) და მოვალეობები კანონით განსაზღვრულია. თუ თვითმართველობა კანონს გადავა—ამის გამსწორებელია თვით კანონი და სამართალი. მაღალ ადმინისტრაციის კი ასეთ როლს ვერ მივანიჭებთ, მას ზედამხედველობის უფლებას ვერ მივცემთ.

თვითმართველობა თავის ფარგლებში ნამდვილი სახელმწიფოა სახელმწიფოში.

მას ევალება ერთი მხრით მოკრება გადასახადების, შენახვა და ხელმძღვანელობა პოლიციის, დაცვა წესიერების და მშვიდობიანობის, მეორე მხრით მისი ვალია ზრუნვა ადგილობრივ კულტურულ და ეკონომიურ საჭიროებაზე, როგორცაა შკოლა სახალხო, საშეალო და უმაღლესი სახალხო სწავლა-განათლება, ბიბლიოთეკა-სამკითხველოების

გახსნა, ხალხის ჯანმთელობაზე ზრუნვა, მეურნეობის განვითარებისთვის ხელის შეწყობა, ქაობების გაშრობა, სარწყავ არხების გაყვანა, მთების და ხიდების გაკეთება, საცდელ მინდვრების დაარსება, მუშათა ყოფა-ცხოვრების გაუმჯობესება და სხვა და სხვა. ერთი სიტყვით, მისი მოქმედება ადგილობრივ ისეთივეა, როგორც მოქმედება ცენტრალურ მთავრობის სახელმწიფოში.

მას თავის საჭიროებათა დასაკმაყოფილებლათ აწერს გადასახადს მცხოვრებთ, რომელნიც მის განკარგულებაში გადადის.

ცხადია ადგილობრივი მცხოვრებლები განსაკუთრებით მუშა და ღარიბ-გლეხობა დაინტერესებულია ამ დაწესებულების თავის ხელში ჩაგდებასა და ადგილობრივ კულტურულ ეკონომიურ საქმეების თავის მოთხოვნილებათა მიხედვით წამართვაში.

ამიტომ იგი ყველაზე უფრო მედგარი დამცველია სოციალდემოკრატიის მოთხოვნილების, რომ ადგილობრივი თვითმართველობა დამოუკიდებელი იყოს.

ასეთ პირობებში ყველა მოხელეები თვით ხალხზე იქნებიან დამოკიდებული და მაზე ბატონობის მაგიერ მის ნამდვილ მსახურათ გადაიქცევიან.

აი ამ გზით განხორციელდება მთელ სახელმწიფოში ხალხის თვითმპყრობელობა.

XIII.

ს ა ს ა მ ა რ თ ლ ე.

დაგვრჩა კიდევ ერთი დარგი სახელმწიფო ძალა-უფლების. ესაა სასამართლო.

„ქმნა მართლისა ხესა შეიქმნს ხმელსა ნედლათა“, ასეთია ბრძნული თქმულება. ჩვენი ძველ სასამართლოებს კი ასეთ სასწაულ მოქმედებას ვერ დავწამებთ. ისინი უფრო სალი და უდანაშაულო ადამიანის ციხეში ჩამოხმობას ემსახურებოდენ.

ამ სფეროშიაც, ამიტომ უნდა ძირითადი ცვლილებები მოხდეს. სასამართლოს მთავარი მიზანია არსებულ კანონიერების დაცვაა, რისთვისაც ის მის დამრღვეველთ სჯის და ასე სამართალს აღადგენს. მისი სიმართლე—ეს კანონის სიმართლეა. თუ კანონი მრუდვს მისი განაჩენიც სწორი ვერ იქნება. მარა შეიძლება კანონი რიგიანი იყოს, განაჩენი კი ურიგო, თუ სასამართლოს ორგანიზაცია უვარგისია, თუ იგი გარეშე გავლენას და კარნახს ემორჩილება.

კანონის გამოცემა—პოლიტიკური პარტიათა ბრძოლის შედეგია სასამართლო კი ასეთ ბრძოლის გარეშე უნდა იდგეს, იგი ასე ვთქვათ, ობიექტიურ მიუდგომელი მსაჯავრის დამდებია იმ ფარგლებში, რაც პოლიტიკურ ბრძოლის შედეგმა დააკანონა. მიკერძებას ცალმხრიობას სასამართლოში ადგილი არ უნდა დაუჩიეს. წინააღმდეგ შემთხვევაში იგი პოლიტიკურ პარტიათა და ჯგუფთა იარაღათ

გადაიქცევა და საერთო ნდობას ვერ დაიმსახურებს. ასეთი იყო ძველი სასამართლო, რომელიც ყველაფერში მთავრობის განკარგულებებს ემორჩილებოდა და მის პოლიტიკურ მოწინააღმდეგეთ სდევნიდა. ვინ არ იცის, რომ ხშირათ მოსამართლენი უკვე დაწერილის განაჩენით მიდიოდენ სასამართლოში და საქმის გარჩევა მხოლოდ ხალხის თვალის ასახვევით ხდებოდა.

რა გასაკვირველია, რომ ასეთ სასამართლოს საზოგადოება მტრულათ უცქერიდა და ყოველთვის ბრალდებულის მისი კლანკებიდან განთავისუფლებას ცდილობდა. ამრიგათ წარმოებდა ბრძოლა საზოგადოებისა სასამართლოების წინააღმდეგ, რასაც ორივე მხრივ სასამართლო იდეის დამცირება მოქონდა შედეგათ: მოსამართლე მოწმეს არ ენდობოდა და მოწმე მოსამართლეს.

და აი ასეთ გახრწნას სასამართლოსი და სამართლის გრძნობისა საზოგადოებაში ამიერიდან უნდა ბოლო მოეღოს.

მართალია კლასობრივ სახელმწიფოში, სრული განთავისუფლება სასამართლოსი კლასთა ბრძოლის გავლენისაგან შეუძლებელია. გაბატონებული კლასები ყოველთვის მოახერხებენ მას თავისი აზრი შეხედულებები მოახვიონ. მით უმეტეს, რომ თვით მოსამართლენი იმავე ბურჟუაზ საზოგადოების შვილი არიან, ბურჟუაზ. მეცნიერებით აღჭურვილნი. მარა ყოველ შემთხვევაში უნდა ვეცადოთ, იგი, რამდენათაც კი შეიძლება, თავისუფალი და მიუდგომელი გავხადოთ.

პირველათ, ყოვლისა ის უნდა თავისუფალი იყოს მთავრობის გავლენისაგან. ამ მიზნით ჩვენ ვთხოვთ და მოუკიდებელ სასამართლოს. რომ მოსამართლეს სვინდისზე მთავრობას ძალდატანების საშვალეება წაერთვას, მას უფლება არ უნდა მიეცეს მოსამართლის დანიშვნა-გადაყენებისა.

პირიქით საჭიროა მოსამართლე მაზე დამოუკიდებელი იყოს და ხალხთან დაახლოვებული, მისი მისწრაფებების მცოდნე, და გამომხატველი ამიტომ იგი უნდა იქნეს არჩეული და ხელშეუხებელი; მხოლოდ ბოროტმოქმედების ჩადენისთვის თვით სასამართლოს შეუძლია იგი პასუხისგებაში მისცეს და სამსახურიდან გადააყენოს.

სამართალი ერთია, ამიტომ მოსამართლეც ერთი უნდა იყოს ყველა წოდების და კლასისათვის. სასამართლო წოდებრივი (გლებთა სასამართლო) და განსაკუთრებული უნდა გაუქმებულ იქნეს.

კანონი მშრალი და განყენებულია, ცხოვრება კი კონკრეტული და მრავალფეროვანი. მსაჯული უნდა კანონების მცოდნე იყოს, ე. ი. სპეციალისტი თავის საქმეში, ისე, როგორც ექიმი, ინჟინერი და სხვა თავის ხელობაში. მარა სპეციალისტები შეიძლება არ იყოს დაახლოვებული მცოდნე ადგილობრივ ცხოვრების, ზნე-ჩვეულების, სულიერი განწყობილების. სასამართლოსთვის კი განსაკუთრებით სისხლის სამართლის საქმეში ამ უკანასკნელს დიდი მნიშვნელობა აქვს.

ადამიანს ვსჯით მისი ბოროტებისთვის, ე. ი.

საზოგადოებისთვის ვნების მოტანისთვის. მარა ბოროტმოქმედება. შეიძლება იყოს ან შემთხვევითი, ან ზნე-ჩვეულებით, ან აღდამიანის ბოროტი თვისებებით გამოწვეული: თვითთულ შემთხვევაში სიმართლე მოითხოვს დამნაშავეს სხვა და სხვანაირათ მოვექცეთ. კანონი კი ასეთ გარჩევას არ აძლევს. საზოგადოების მიზანია ბოროტი გაასწოროს, გაუსწორებელი კი თავიდან მოიშოროს. კანონს სხვა საზომი აქვს. თვითთულ ბოროტმოქმედებას თავის განსაკუთრებული სასჯელი მიუჩინოს. ამით იგი ცხოვრების მრავალფეროვანებას ვერ ფარავს, და ამ მხრით შესწორებას საჭიროებს.

ასეთ შესწორებას მივალწევთ ნაფიც მსაჯულთა შემოღებით. ეს აუკანასკნელი დგება ყველა სრულწლოვან მცხოვრებთაგან, განურჩევლათ მისი განათლების და სპეციალობისთ. ნაფიც მსაჯულთა მონაწილეობა საქმეში ორნაირია: დაბალ სასამართლოებში მაგ. მომრიგებელ მსაჯულთან, რომელიც მცირე საქმეებს არჩევს დარი მოქალაქე ინიშნება განაჩენის გამოტანაში მონაწილეობის მისაღებათ; გერმანიაში ასეთ სასამართლოს ეწოდება „შოფენებეს“ სასამართლო. ზის ერთი მომრიგებელი მოსამართლე, იურისტი, კანონების მცოდნე, და რარი მოქალაქე, მცხოვრებთაგან არჩეული; საერთოთ ყველანი ხმის უმეტესობით წყვეტენ დამნაშავეა თუ არა ბრალდებული და რამდენათ. შემდეგ ოფიციალური მოსამართლე — შესაფერ რეზოლიუციას სწერს — ე. ი. განაჩენს ასაბუთებს.

მალალ სასამართლოებში, სადაც მსხვილი ბოროტმოქმედებანი ირჩევა საზოგადოების მიერ თავის წრიდან არჩეული ანაფიცე მსაჯულები 12, ან მეტი, ცალკე სხედან, მათეციალური მოსამართლენი კი ცალკე ნათეცი მსაჯულები უსმენენ მოწმეებს, ბრალმდებელს, დამცველს და სწყვეტენ ერთს. დამნაშაევა თუ არა? და თუ დამნაშაევა, ღირსია სასჯელის შემსუბუქების, თუ არა? ამით თავდება მათი მოვალეობა, შემდეგ რთეციალური საოლქო სასამართლო ანთაეისუფლებს ან შესაფერ სასჯელს უწყვეტს ბრალდებულს ნათეცი მსაჯულთა განაჩენის თანახმათ.

ამნაირათ მოსამართლეები კანონებით ხელმძღვანელობენ. ნათეცი მსაჯულები და მოფენები კი თავის საზოგადოებრივი ინსტიქტით, თავის სვინდისით და შეხედულობით, როგორც სვინდისი გაუქრისთ, ისე გადაწყვეტენ. მათ შეუძლიათ დანაშაულის ჩადენა აღიარონ, მარა სასჯელისგან გაანთაეისუფლონ, თუ სვინდისით ამას საჭიროთ დაინახვენ, თუ კაცი მაგ. უბედური შემთხვევით ჩავარდნილა ბოროტებაში და სხვ. აქ უმაღლესი მსჯავრი მათ ეკუთვნით. ნათეცი მსაჯულთა დაწესებულება სვინდისის სასამართლოა, ეს საზოგადოების ხმის მოსმენაა.

ამით ხალხს საშვალეა ეძლევა ბოროტმოქმედებას ებრძოლოს, ხოლო უდანაშაულო პირი სასჯელს გადაარჩინოს, უნებლიეთი შეცთომა აპატივოს, ბოროტი ადამიანი კი მკაცრათ დასაჯოს. ერთი სიტყვით, ის „მართალი სამართალი ქმნას“, რომელიც ხმელ ხესაც კი ანედლებს.

ამიტომ სოციალ-დემოკრატია თხოულობს შემოღებულ იქნას არჩეული დამოუკიდებელა სასამართლო და ნაფიც მსაჯულთა ინსტიტუტი.

სამართალი რომ ხალხისთვის მისაწდომი და გასაგები იქნეს, იგი უნდა წარმოებდეს მცხოვრებთათვის. გასაგებ ენაზე. სამშობლო ენის შემოღება სასამართლოში ამიტომ ერთი მთავარი მოთხოვნაა ლებათაგანია სოციალდემოკრატიისა.

დაბოლოს სასამართლო უნდა იყოს სწორი და სწრაფი. საქმის გაჭიანურება და მისი დაუსრულებლათ დევნა მუშა ხალხს არ შეუძლია. დამნაშავეს დიდი ხნით ბრალდების წაუყენებლათ ციხეში დამწყვდევა ეს წინდაწინვე მისი დასჯაა, ეს პიროვნების ხელშეუხებლობის სრული გაუქმებაა. ინგლისში, სადაც პიროვნების თავისუფლება განვითარებულია, ასეთი წესი არსებობს: ყოველ დატუსაღებულს უფლება იქვს მოითხოვოს 24 საათში მოსამართლეს წარუდგინონ და ბრალდება წამოუყენონ, ან გაანთავისუფლონ.

ასეთი წესი უნდა იქნეს შემოღებული ჩვენშიაც. სასამართლოს გარეშე არავის აქვს უფლებმოქალაქის განსჯის და განაჩენის გამოტანის; ადმი, ნისტრაციის მიერ მოქალაქის დაკერა; ციხეში ჩასმა-გადასახლება და დაჯარიმება უნდა სავსებით გაუქმებულ იქნეს, როგორც თვითნებობა და უსამართლობა, როგორც იარაღი ხალხის დამონების და დამორჩილების.

მხოლოდ ასეთ პირობებში შეიძლება ადამიან

ნის უდანაშაულოთ დასჯა თავიდან ავიცილოთ და სასამართლო ვაბატონებულ კლასების ხელში მუშათა კლასის საწინააღმდეგო იარაღათ არ გადავაქციოთ.

XIV

დემოკრატიული რესპუბლიკა და სოციალიზმი.

ჩვენ განვიხილეთ ბოკლეთ აგებულება დემოკრატიულ წყობილების, ე. ი დემოკრატიულ რესპუბლიკის.

ასეთ წყობილების მთავარი მიზანი და დანიშნულებაა ერთი მხრით უზრუნველყოს ხალხის თავისუფლება, მათი პიროვნების ხელშეუხებლობა, და მეორე მხრით ხელი შეწყონ მუშათა კლასის ნივთიერ ზ გონებრივ მდგომარეობის გაუმჯობესებას: ხელფასის, შ საათის სამუშაო დღის, დაზღვევის და სხვ. კანონების შემოღებით. ყველა ამის განხორციელება დამოკიდებულია იმაზე, თუ ვის ავირჩევთ და გავაგზავნით პარლამენტში კანონების გამოსაცემათ. ამ წიგნაკში კი ჩვენ შევეცადეთ მხოლოდ დაგვესურათებია მკითხველისთვის ისეთი წყობილება, რომელიც ხალხს ხელს არ შეუშლის ღირსეული წარმომადგენლების არჩევაში და ამ არჩეულებს—ხალხს სასარგებლო კანონების გამოცემაში.

მარა გადამეტებულ იმედებს დემოკრატიულ წყობილებაზე ვერ დავამყარებთ. სოციალ-დემოკრატიას ვრ სურს ხალხის მოტყუება და ის დემოკრატიულ წყობილებას სრულ სამოთხეთ ვერ დაუხაზავს მას.

თავისთავად ცხადია, სანამ საზოგადოებაში ეკონომიური უთანასწორობა არსებობს, სანამ ერთი ნაწილი მდიდარია, მეორე კი ღარიბი, ერთი დაქირავებული, მეორე კი დამქირავებელი, ერთი სიტყვით სანამ საზოგადოება ეკონომიურ უსამართლობასა და ადამიანისაგან ადამიანის გაყვლეთაზეა აგებული, შეუძლებელია რაიმე სახელმწიფო წყობილება სრული და უნაკლულთ გამომხატველი იქნეს ხალხის ინტერესების. ეკონომიურათ დაჩაგრული კლასი ყოველთვის დაჩაგრული იქნება პოლიტიკურათაც. გაბატონებული კლასები ყოველთვის შესძლებენ მთავრობის მთელი ორგანიზაცია თავის სასარგებლოთ გამოიყენონ, ხალხის ინტერესები გაამრუდონ, ხალხის ნება გააუკუღმართონ.

ძლიერისაგან უძლურის მოსყიდვა, მუქარა, დაშინება და სხვ. ჩვეულებრივი მოვლენაა. ხშირია აგრეთვე სარგებლობა სუსტის, ღარიბის, უცოდინარობით, გაუნათლებლობით და უვიცობით.

ამიტომ სოციალდემოკრატია ამბობს, რომ თვით დემოკრატიული წყობილებაც ვერ დააკმაყოფილებს სავსებით ხალხის ყველა საჭიროებებს, იგიც ვერ მისცემს ხალხს სრულ ბედნიერებას.

დემოკრატიული რესპუბლიკა კარგია მხოლოდ იმით, რომ საშვალებას აძლევს მშრომელს თავის ინტერესებისათვის იბრძოლოს, და ასეთ ბრძოლას უადვილებს.

ამ მხრით დემოკრატიული რესპუბლიკა ყვე-

ლაზე უმჯობესი პოლიტიკური ფორმაა ბურჟუაზიულ წყობილებაში მუშათა კლასისთვის.

მარა სოციალდემოკრატია ბურჟუაზიულ საზოგადოების ფარგლებით არ კმაყოფილდება. მისი საბოლოო მიზანია ადამიანისაგან ადამიანის დაჩაგვრა მოსპოს, კერძო საკუთრება გააუქმოს, და პოლიტიკურ თანასწორობასთან ერთად ეკონომიური თანასწორობაც განახორციელოს. ეს შეიძლება ყველა საწარმოვე იარაღების საზოგადო საკუთრებათ გამრცხადებით და საზოგადოებრივ წარმოების მოწყობით. მაშინ გაუქმდება კლასებათ დაყოფა, აღარ იქნება მდიდარი და ღარიბი. იქნება მხოლოდ საყოველთაო თანასწორობა და ბედნიერება.

ასეთ წყობილებას ეწოდება სოციალიზმი.

სოციალდემოკრატია დღევანდელ რევოლიუციის ხანაში ცდილობს განახორციელოს პრინციპი პოლიტიკურ თანასწორობის, ე. ი. თანასწორობის კანონის წინაშე, რისთვისაც მოითხოვს დემოკრატიულ რესპუბლიკის დამყარებას.

მდიდართა მცირე რიცხვოვანი ჯგუფი მაშინ მუშათა კლასს პოლიტიკური უფლებებით ვეღარ დაი მორჩილებს.

დემოკრატიულ რესპუბლიკაში მუშათა კლასი (საესებიც) ისარგებლებს სრული თავისუფლებით სიტყვის, კრების, კავშირების, გაფიცვის და ამ საშუალებით მოემზადება მომავალი სოციალისტური წყობილებისათვის.

მხოლოდ შეგნებული, კლასობრივად გათვით-
ცნობიერებული, სოციალდემოკრატიულ პარტიებში
და პროფესიონალურ კავშირებში შეერთებული
პროლეტარიატი შესძლებს ბურჟუაზიული წყობილე-
ბის საბოლოო დამხობას და ეკონომიურ თავისუფ-
ლების დამყარებას.

ამიტომ, დემოკრატიული რესპუბლიკა სო-
ციალდემოკრატიულ პარტიისთვის მხოლოდ მან-
ლობელი მიზანია. და თან საშვალეა საბოლოო
მიზნის — სოციალიზმის განსახორციელებლათ.

აი ამისთვის ვთხოულობთ ჩვენ დღეს დემოკ-
რატიულ რესპუბლიკის შექმნებას.

